

■ COLUMNA


Mo che Seppa metschia

DA GIUSEP NAY

Mo che Seppa metschi»: Quai era en nossa gronda famiglia la remartga che metteva la chaussa puspè en il dretg lieu, sch'in da nus guarda-va mo per sasez. Ina tala remartga en il senn d'in appel pli u main insistent da patratgar er als auters è ozendi adina puspè ad ins orasum la lieunga.

Tgi che vesa be ses con-sum ed avantatg dal service public vul mo quel e pajar mo quel e nagut auter. Automobilists vesan be lur autostradas e na vulan betg esser vatgas che dattan era latg per auters basegns generals. Ils viandants ed ils chatschaders vesan tar in project d'in parc natiral be mintgamai sulet lur interess e quels d'ina entira regiun emportan pauc. – Tals exempels dessi anc blers.

En la gassetta romanda «Le Temps» hai jau per casualità – u er betg? – legì quest glindesdi en il medem mument in artigel interessant d'ina nova pesta che smanatscha nosa democrazia ed en LQ la resoluziun da la Surselva Romontscha che smanatscha il rumantsch grischun. La pesta ch'il politolog enconuschent vesa en connex cun las iniziatiavas allegadas che vegnan quels dis en votaziun, numna el «consumissem narcistic». El constatescha ina midada fatala per nosa societad davent dal «burgais responsabel er per ils interess publics» vers in «simpler consumer democratic». Ed il pir saja che nosa democrazia directa è daventada in trampolin per il segund tip da burgais ed il consumissem narcistic.



Nagut auter demussa la resoluziun allegada da la Surselva Romontscha. Ils idiomists che vulan mo lur idioms e vulan avair da far nagut u uschè pauc sco mo pussaivel cun il rumantsch grischun na sa sentan betg responsabels per l'interess general da Rumantschas e Rumantschs da furmar ina unitad e da sa preschentar ensemen sco ferma cuminanza solidara. Per quel intent dovri in liom communabel ed ina preschientscha regulara dal rumantsch en la publicità, tant sin plaun naziunal sco chantunal. E quai garante-scha mo il rumantsch grischun adequatamain ozendi. Betg vulair sustegnair vinavant quel tenor il basegn adina pli grond, quai vul dir nagut auter che vesair mo sasez e l'agen idiom. E quai è nuschaivel e la finala mortal per nosa lingua materna adina pli periclitada. Nossa minorità na viva betg mo sch'ella vul viver, sco la strategia da la LR para dapi intgin temp dad esser. Ella ha adina stuì e sto en il temp dad oz vegnir tgirada pli che mai per esser preschenta en il mintgadi en tants secturs sco pussaivel. Quai è mo realisabel cun ina lingua scritta comunabla, dasper la varietad dals idioms che restan impurtants sco adina.

Betg vulair sustegn federal persunter, dir ch'il rg haja purtà mo discordia e pretender che la pasch linguistica saja dada cun betg promover pli la cha-pientscha necessaria dal rg, quai demussa exact il consumissem narcistic fatal denunzià. Mo che Seppa metschja è qua apparenta-main la devisa. Cun ina tala tenuta na san ins dentant betg vesair che l'opposiziun violenta sut l'egida da las Pro idioms encunter il rumantsch grischun pudess pir avair creà quella discordia e che lur exponents semnan discordia cun excluder e discreditar tut tgi che n'è betg da lur avis. – «Difficile est, satiram non scribere», manegiavan gia ils Romans.

Na fitg nausch fiss quai atgnamain betg anc, sche la Lia Rumantscha na vesess betg cun il program e las propostas da sia dieta dals 11 da zercladur ses salvament ual en ina pura democrazia directa senza in parlament represchenta-tiv. Ina tala fiss exact il trampolin zunt privlus per in pur consumissem narcistic er entaifer la Rumantschia.

Sin il nov president da nosa uniun tetgala è naging scui, vis la sfida, cun la quala el è confruntà. La speranza mora dentant il davos, sco ins di. Ed il scrivent da questas lingias ha ord sia experientscha cun las turbulenzas da ses temp cun il «de e da» en la Romania anc adina speranza. Il flad da las vuschs ponderadas e raschunaivlas è stà lura pli lung e vegn er ad esser oz pli lung. – Il temp sa mida e nus cun el, e quai vala magari er per quels che na vulan betg sa midar.